

**PM mahu polis penuhi dua harapan rakyat**  
**Utusan Online**  
**13 April, 2012**

KUALA LUMPUR 12 April - Polis Diraja Malaysia (PDRM) perlu memenuhi dua harapan rakyat iaitu memastikan keselamatan awam terjamin pada setiap masa serta bijak mengimbangi keperluan hak asasi individu dengan keselamatan umum.

Perdana Menteri, Datuk Seri Najib Tun Razak berkata, harapan tersebut perlu dicapai kerana setiap agensi kerajaan khususnya organisasi kepolisan wujud kerana rakyat dan perlu memberi perkhidmatan terbaik kepada masyarakat.

Beliau yang yakin dua harapan tersebut mampu dicapai berkata, ia satu cabaran bukan sahaja kepada PDRM tetapi merangkumi Kementerian Dalam Negeri serta beliau sendiri selaku pemimpin nombor satu negara.

"Kedua-dua harapan rakyat itu perlu dipenuhi dalam konteks Malaysia sebagai sebuah negara demokrasi berparlimen, iaitu kerajaan dipilih oleh rakyat. Jadi penting bagi setiap agensi kerajaan itu wujud untuk rakyat dan kerana rakyat.

"Rakyat kini jauh terpelajar dan mereka mahu hidup dalam komuniti selamat yang bebas daripada sebarang unsur jenayah. Jangkaan ini munasabah kerana sebagai insan kita tidak mahu berada dalam persekitaran tidak menentu.

"Mereka juga mahu hak asasi sebagai individu dihormati, justeru polis perlu bijak mengimbangi dengan keselamatan umum," katanya semasa berucap merasmikan Menara 1 Bukit Aman PDRM, di Bukit Aman, di sini hari ini.

Hadir sama isteri beliau, Datin Seri Rosmah Mansor; Menteri Dalam Negeri, Datuk Seri Hishammuddin Tun Hussein; Menteri Kesihatan, Datuk Seri Liow Tiong Lai; Ketua Polis Negara, Tan Sri Ismail Omar dan Panglima Angkatan Tentera, Jeneral Tan Sri Zulkifeli Mohd. Zin.

Sempena majlis berkenaan, Perdana Menteri meluluskan peruntukan tambahan RM1.5 juta untuk pembinaan taman asuhan kanak-kanak (Taska) selain mengesahkan bakal mewujudkan pusat Permata Negara di Bukit Aman.

Serentak dengan majlis itu juga, beliau turut merasmikan Pusat Saringan Kesihatan Bukit Aman.

Dalam perkembangan berkaitan, Najib berharap PDRM dapat meningkatkan lagi keyakinan rakyat terhadap organisasi itu yang ketika ini berada di tahap 70.5 peratus, menerusi amalan kecemerlangan dalam perkhidmatan.

Katanya, jasa PDRM dalam mengekalkan keamanan tidak boleh dinafikan sehingga Malaysia diiktiraf sebagai negara ke-19 paling selamat di dunia oleh Indeks Keamanan Global (GPI), tetapi masih ada ruang yang perlu dipertingkatkan.

Sementara itu beliau menambah, PDRM telah memberikan kerjasama yang tinggi sehingga membolehkan tiga Ordinan Darurat dimansuhkan, selain undang undang baru menggantikan Akta Keselamatan Dalam Negeri (ISA) dapat digubal.

"Dalam hal ini kita mendapatkan pandangan PDRM terlebih dahulu ketika mahu menggubal akta baru bagi memastikan kuasa yang diberi mencukupi untuk polis mencegah jenayah, menangani sindiket dan keganasan," katanya.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2012&dt=0413&pub=Utusan\\_Malaysia&sec=Dalam\\_Negeri&pg=dn\\_01.htm](http://www.utusan.com.my/utusan/info.asp?y=2012&dt=0413&pub=Utusan_Malaysia&sec=Dalam_Negeri&pg=dn_01.htm)